

# Мевлид-и Шериф

на крымскотатарском языке

Алемлернинъ Рабби олгъан, ич бир шейге бенъземеген, ерсиз бар олгъан, башлангъычы ве сонъу олмагъан Аллаһкъа хамд,  
Ресуллернинъ энъ шеревлиси олгъан Мухаммед Пейгъамберимизге саят ве селямлар олсун!

Сайгъылы мусульманлар!

Рабиуль-эввелъ айнынъ 12-нджи куню мусульманлар ичюн гузель ве хайырлы бир куньдир. Шу куню яратыкъларнынъ энъ фазилетлиси ве Аллаһнынъ энъ севген къулу Мухаммед Пейгъамберимиз дюньягъа кельди. Бу мубарек кунни къайд этмек – бутюн Ислам дюньясында яхшы бир адет олып къалгъан. Бу куньде Мевлид-и Шериф окъулып, чешит садакъа ве хайырлар дагъытылып, гедженинъ берекетинден файдаланылып. Кене бу куньде топланып берабер окъулгъан Мевлид-и Шерифнинъ берекетинден де эр кес файдаланылып.

Пейгъамберимиз Мухаммед салляллаһу алейһи весселлем Филь йылында догъды. О йылда олып кечкен «филь вакъиасы» Къур'ан-и Керимде «Эль-Филь» суресинде анълатылды. О вакъытта Пейгъамберимизнинъ къартбабасы Меккенинъ реиси ве къаравулы эди. Кябени йыкъмагъа истеген Абраһа адлы къафир падишах, бир чокъ аскерлер алып, Кябенинъ алдына кельди. Аскерлернинъ башында филлер бар эди. Филлери олгъан аскерлер о вакъыт пек кучлю эди, чюнки Арабистан тарафларында филлер пек аз эди. Амма Аллаһу Та'ала Кябени къорчалады. Абрахананынъ аскерлерини эбабилъ къушлары келип таш атып ольдюрдилер.

Пейгъамберимизнинъ догъгъан кунюнде, йыллар девамында сувнен толу олгъан Совет адлы голь къуруды ве о заманда атешке табынгъан междусилернинъ бинъ йыл янгъан атешлери сёнди. Бизим сайгъылы Пейгъамберимиз догъгъан вакъытта дюнья нургъа толды.

Мевлид-и Шериф акъкъында язгъан базы алимлер шойле анълаттылар: Вехби къызы Эмине Реджеп айынынъ ильк геджеси олгъан джума геджеси Пейгъамберимизни къарнында ташып агъыраякълы олды. Агъыраякълыкъ алыны Пейгъамберимизнинъ анасы бойле анълатты: «Оны ташыгъанда ич агъыраякълы олгъанымны ве бир агъырлыкъ ташыгъанымны, башкъа апайлар дуйгъанлар киби ич бир шей дуймадым. Бир кунъ юкъусырагъанда манъа бир киши келип, «Агъыраякълы олгъанынъны дуйдынъмы?», деп сорагъаныны хатырлайым. Мен санки: «Ёкъ!» деп джевап бердим. О манъа деди ки: «Сен бу умметнинъ Эфендисини олгъан Пейгъамберни къарнында ташыйсынъ». Пейгъамберимизнинъ догъгъан куню (базарэртеси) онынъ анасы Эмине деди ки: «Оны догъургъанда ич бир зорлукъ

чекмедим. Оны догъургъан вакъытта, шаркъ ве гъарп арасындаки ерни айдынлаткъан бир нур пейда олды. Пейгъамберимиз суннетли догъгъандан сонъ, эллерини, тизлерини ерге къойып, башыны котерди».

Сайгъылы мусульманлар!

Пейгъамберимизнинъ догъгъан кунюни биринджи кере иджреттен 600 йыл сонъ къайд этилер. Мевлидни окъуткъан биринджи инсан – Ирбиль укюмдары Эль-Мелик Эль-Музаффер олды. Бу укюмдар алим, джесюр ве джумерт, Аллаһтан къоркъкъан бир инсан эди, онынъ бир чокъ къыйметли эсерлери, китаплары бардыр. Бу укюмдар, Рабиуль-эввель айнынъ 12-нджи куню буюк байрам япып, бинълердже айван сойып, мусульманларгъа татлылар дагъытты. О девирде шаркъ ве гъарпта олгъан алимлерден ич бириси бу аркетни ред этмеди. Даа сонъра гъарпта ве шаркъта яшагъан мусульманлар бу адетни девам эттирдилер.

Пейгъамберимизнинъ догъгъан кунюни къайд этмек – гузель бид‘ат, яни динимизге кирсетильген гузель янъылыкъ сайылыр, базы инсанлар айткъаты киби, бу – ярамай бид‘ат дегильдир. Бу мубарек куньлеринде хайырлы амеллер чокълашыр, мусульманлар бир ерде топлашып, Аллаһнынъ адыны бол-бол зикр этерлер ве Пейгъамберимизнинъ догъумыны анълатырлар. Бунлар эписи динимизге уйгъун, терс дегильдир.

Лякин базы мевлид китапларында динимизге къаршы олгъан шейлер бар. Месея, бир мевлид китабында шойле язылгъан: «Аллаһ юзюндеки нурдан бир парча алып онъа «Мухаммед, ол» деди ве о нур парчасы да Мухаммед олды». Бильмек керекмиз ки, Аллаһ нур я да онъа ошагъан шей дегильдир. Мухаммед Пейгъамберимиз нурдан яратылмады ве Аллаһтан бир парча дегильдир!

Аллаһ, ерлерни яратмаздан эвель бар эди ве ерлерни яраткъан сонъ да мекянсыз оларакъ бардыр. Аллаһны акъыл, фикир я да хаялнен тасаввур этмек мумкюн дегиль.

Базы мевлид китапларында расткельген янълыш ибарелерден бирисинде де: «Пейгъамберимиз яратыкъларынынъ энъ биринджиси» – деп, айтыла. Бу ибаре Къур‘ангъа терстир, чюнки Аллаһу Та‘аля Къур‘ан-и Керимде «Эль-Энбия» суресининъ 30-ынджы аетинде буюра:

(وَجَعَلْنَا مِنَ الْمَاءِ كُلِّ شَيْءٍ حَيًّا)

Бу аетте Аллаһу Та‘аля бутюн джанлыларны сувдан яраткъаныны бильдирди, яни сув – бутюн яратыкъларнынъ эсасыдыр. Базы арап улькелеринде муэззинлер эзан окъугъанда айталар: «Салят ве селямлар сенинъ узеринде олсун, эй, махлюкъатнынъ эвели ве ресулленинъ сонъу». Бойле айтмакъ олмаз, чюнки Пейгъамберимиз Аллаһнынъ ильк яратыгъы дегильдир.

Эй, мухтерем мусульманлар, бойле мубарек геджелерде, бизге дюнья ве ахиретте файда кетиреджек ильмимизни, бильгилеримизни арттырмакъ керекмиз. Япкъан хайыр ишлеримизде Пейгъамберимизнинъ ёлуны тутмакъ керекмиз.

**Буклет содержит религиозную информацию. Нельзя класть его в грязные места и относиться к нему неуважительно!**